

Gyaez Liujcwngz

□Cungh Hihcwnggh/钟希增

Mboengqgonq, gou ndaej camgya aen hozdung Gvangsiah Minzczuz Bause “caezcaemh byaij Gvangsiah · camh Liujcouh” daengx meizdij hengzdoengh, dou bae daengz Liujcwngz Yen, caenda raen Liujcwngz Yen guh hong dajcauh yiengh minzczuz doxgiet cinbu guh ndaej gig ndei, ndawsim laeglemx gyaez gizde.

Liujcwngz Yen miz Cuengh、Gun、Mulauj daengj lai aen minzczuz comz youq, lij miz daihbuek vazgyauz doenghbaez daj guekrog dauqma, gak cuz yinzminz ndaej youq aen ranz hung neix doxndiep doxgyaez、doxbang doxcoengh, doengzcaez guh gwn.

Dou youq Liujcwngz guh caijfangj song ngoenz, daengx aen duenzdoiha baen baenz seiq aen siujcuj, couh lumj seiq aen senhfunghdui, ndonj daengz gak gehgungx bae damqyawj gyoengqde baenzlawz hengzguh hong dajcauh yiengh minzczuz doxgiet cinbu. Aen siujcuj dou youq Liujcwngz Yen Hingzcwng Swnjbihgiz、Aen Cungsims Yenzgiu Oij、Fuzhuj Vazgyauz Gvanjlighj geij giz neix ndaejnyi aen doek aen gojsaeh gamjdoengh vunz, seizneix dauqngex hwnjdaej lij lumj denyinj baez muq baez muq nei yienh’ok najda.

Dou caijfangj giz daih’it dwg Hingzcwng Swnjbihgiz. Byaij haeuj ndaw ding, gwnz ciengz venj miz baenz fuk baenz fuk dozveh caeuq byauhyij, yienh’ok gak aen minzczuz Liujcwngz Yen doxgiet haenqguh、doengzcaez hwnghfat, hawj vunz yawj le roxnyinh daengz daengx ndang raeujrub rengzrwd. Gizcangj Lij Myauz cingzndat fwgfwg coh dou ciengzsaed gaisau naeuz, gaenh bi daej gyoengqde ciuq hong baijbouh gak gaep dangjvej、cwngfuj baihgwnz, yungzhab gij eiqsik caezcaemh Cunghvaz Minzczuz haeuj hong ngoenznaengz bae. Bouxguhghong ndaw giz mboujdan sug guh yezvu, lij rox caeuq vunz lai doxgyau, naihsim dap mizgyen vwndiz, fugsah cwngvu caeuq gij leixniemh minzczuz doxgiet yungzhab ndaej ceiq ndei, hawj moix boux vunz ndaw hoz cungj roxnyinh daengz bonjfaenh youq gyang ranz hung lai minzczuz guek raeuz. Baengh aen cawjdaez “lamz cwng’vu” ingjciuq “sigloux hoengz” de, haenqrengz haiguh hong dajcauh minzczuz doxgiet cinbu, aeu ndaej cingzyauq yienhda, caux ok aen gugmienh moq ndaw danvih hingzcwng gihgvanh, sawj Liuj-

cwngz Yen banhsaeh bienq baenz daengx guek ceiq fuengbienh ceiq yinzsing’va.

Dingq Lij gizcangj gaisau gvaq le, gou lumj yawjraen le benq dieg miz vuedlig caeuq maqmuengh ndeu, ndaw hoz gag mboen naeuz:

Hong minzczuz cwng’vu,
Liujcwngz guh baenz ndei,
Cig ndaej vunz ciuqei,
Wnggai caez doigvangq.

Biek Hingzcwng Swnjbihgiz le, dou youh bae caijfangj Liujcwngz Yen Aen Cungsims Yenzgiu Oij. Baez yamq haeuj yenzgiu cungsims, raq heiq singisien ndeu ci gvaq naj daej. Yawj daengz gaiq baizbenj hoij bangxiengz de couh gag rox, gizneix bietdingh dwg gizdieg cienmonz ung saehnieb diemzvan, dwg gizdieg yienjloh ukgvai boux gohyenz yinzyenz.

Boux fucwz dazyinx de naeuz dou nyi, aen yenzgiu cungsims seizneix gungh miz 10 boux vunz guhhong, 8 boux dwg vunzgohyenz, gyoengqde bouboux ukgvai miz dungxaiz, daegbied dwg Luz Vwnzsiengz caeuq Cwnggh Gigsuz song boux lauxhangz neix, songde dazyinx daengx ban vunzgohyenz, mbouj lau dwgrengz, haenqguh lai bi, ciengzciengz bae daengz gyaeujnaz gyaeujreih, caeuq boux ndaem oij ganggoj doxgyau, doengzcaez damqra diuz roenloh hwnghfat canjnieb ndaem oij. Doengzseiz lij caeuq baihrog lai aen dayoz、gohyenz danvih guh gisuz doxgap. Gyoengqde gonqlaeng ung ok haujai oij binjcungj moq, ceiq mizmingz dwg Gveiliuj 05136, cungj oij neix mbouj yungzheih dai, lij ndaem ngaih, canjliengh sang, hamz diengz lai, senq youq Gvangsiah、Yinznanz、Gvangjdungh daengj dieg doigvangq ndaem, gijgvangq daemx 500 fanh moux. baenz aen binjcungj byauhcising oij daih daihhaj vuenhcungj guek raeuz. Vihneix, aen yenzgiu cungsims caemh ndaej “daengx guek nungzyez hidungj senhcin danhvei” “Gvangsiah gohyoz gisuz senhcin ciengj itdaengjciengj” daengj lai yiengh mingzdaeuz.

Gyoengq vunzgohyenz neix guh gij hong de caen doiq ndaej gvaq gij mingzdaeuz neix lo. Gyoengqde yungh cienzbouh simgei caeuq raemxhanh, guh ok fan saehnieb hung diemzvan, mboujdan dwg vih daezsang canjliengh caeuq caetliengh oij, engq youqgaenj dwg gvansim gij saedcej boux guh reihnaz lajmbanj

baenzlawz cij gvaq ndaej ndei. Couh lumj Luz Vwnzsiengz gangj coenzvah de naeuz: “Maqmuengh boux ndaem oij yied ndaem yied van, mboujdan ndaej duetgungz, lij ndaej baenzfouq.”

Gou youq ndaw hoz gingqfug gyoengq vunzgohyenz neix, nyaenx mbouj ndaej gag ngon fwen naeuz: Cangh gohyenz gaenxgyaek, Cingznaek ganq “ceh van”, Ndaem oij canjliengh sang, Ranzranz caez vuenheij.

Haet daihngex gwn ngaizromh gvaq, dou dingq bause anbaiz, laebdaeb bae caijfangj Fuzhuj Vazgyauz Gvanjlighj.

Bae daengz Fuzhuj Vazgyauz Gvanjlighj, roxnyinh daengz benq diegnamh gizneix lai unq lai raeuj, gizgiz cungj miz raq heiq rang caz. Gvanjlighj fucujyin giem Nungzcangz Cazcangj cangjicangj Hoz Haijvaz lwnh naeuz, gizneix caz canjnieb hwnghfat hoenghghwdhwd, gaenq baenz hangh ginghci souhaej youqgaenj ndaw gvanjlighj ndeu. Gaenh bi daej, aen cazcangj de yinxhaej gij hong guhcax senhcin, guh ok caz engq ndei, mboujdan gai daengz daengx guek gak dieg, lij gai daengz guekrog bae, aeu ndaej ginghci yauyiz cingq ngoenz beij ngoenz ndei.

Fuzhuj Vazgyauz Gvanjlighj guenj miz 3000 lai vunz, dingz lai cungj dwg gij lwg gij lan doengh boux Vazgyauz daj Yeznanz dauqma ndaw guek haenx, gyoengqde daiq vwnzva caeuq conzdungj bonjfaenh dauqma, youq benq dieg neix comz giet baenz ndaek ndeu. Gyoengqde caeuq doengh gij vunz bonjdieg guhdoi cab youq, dox aeueiq, dox bauyungz, doxhag doxbang, caezcaemh caux ok gij ndwenngoenz gyaunde. Ndaej cazcangj daiqdoengh, gaenxgyaek guhhong, doxcanj ndaem caz, caux ok gij saedcej vuenyungz. Gyoengqde gag mbanj gag gangj gij vah bonjfaenh, miz gangj Cuengh, miz gangj Gun, miz gangj Begvah, miz gangj Yinghyij, hoengz ngoenznaengz cungj ndaej doxhuz caemh youq, gangjicangj riuriu, lumj dwg caemh ranz vunz ndeu.

Youq Fuzhuj Vazgyauz Nungzcangz Cangzsiyvanj, aen caijden hung bangxiengz ndawding cuengqingj senhconz sibinz, gou daj gyaenx ndaej yawj daengz gij cingzgingj nauhnauh yiedyied gak cuz yinzminz angqcomz guhdoi. Gyoengqde daenj gak cungj gak yiengh buhvaq

ndeyawj angjda, angqyangz diuq foux、vuenlag eu fwen, doxcaeuq angq gvaq ngoenzciet “sam nyied sam”. Yawjraen faenh cingzngex naekna lai aen minzczuz neix, gou fwt roxnyinh lumj ndaej ndoet gwn cenj raemxcaz ndeu, heiqhom iemq haeuj daep haeuj bwt bae, sawj vunz gag mbouj rox mbouj nyinh haenggyaez cungj gwzgis lai aen minzczuz Cungguek raeuz neix.

Ndwn youq gwnz Gvangjicangz Fuzhuj Vazgyauz Gvanjlighj, gou roxnyinh minzczuz doxgiet couh lumj diuzsai nyangqnyat ndeu, nangq lienz gak minzczuz yinzminz hwnjdaej ndaetndwtndwt bae, hawj gyoengqde giengdingh saenqsim, doengzcaez haenqrengz guh, doengzcaez hoenghvuengh, doengzcaez veh aen lamzdoz daihfukhwng Cunghvaz Minzczuz.

Yawj lai cix gvai, raen lai cix rox, baez caijfangj hozdung neix, gou cingqcaen ndaej roxyiuj, gij eiqsik caezcaemh Cunghvaz Minzczuz raeuz, gizaed couh yo youq gak aen fuengmienh gwnzbiengz raeuz. Mbouj saenq mwngz yawj Liujcwngz Yen, mbouj guenj dwg boux guh fugsah cwngvu cauqmoq, roxnaeuz bouboghyenz gaenxgyaek ung ceh’oij, roxnaeuz gyoengq Vazgyauz daj guekrog dauqma doxgap haenqrengz guh caux ngoenz moq, cungj dwg yungh saedsaeh hengzdoengh geqlwnh gij gojsaeh sawj vunz yaek maez yaek fiz haenx.

Mwh dou guh sat caijfangj yinvu le naengh ci dauqma Namzningz, gou miz di sij mbouj ndaej biek bae, daj cueng ci caiq yawj benq dieg cingz naekgywgywg Liujcwngz haenx baez ndeu. Gizde moix goengq bya moix diuz rij, moix go faex moix go nywj, cungj lumj yaek hah dou gaejbah lizgyae, laebdaeb dingq gyoengqde gangj gij goj vunz haenx. Gou fwtfwh fwen yinx lo, langh sing gag eu hwnjdaej:

Gizneix dieg gyaeu lai,
Vunz ukgvai rox guh,
Raemxmba lae conghmuh,
Etcej guh baenz gwn.

Lai minzczuz doxgiet,
Yied guh yied baenz ndei,
Dangq caemh ranz doxgyaez,
Doengzcaez gvaq ngoenz moq.
Gou siengsaenq, daengzcog,
Liujcwngz Yen gij hong dajcauh guhyiengh minzczuz doxgiet cinbu bietdingh guh ndaej engq ndei. Gou hix yaek aeu lailai guh fwen ndei daej danqhaenh, sawj engqlai vunz roxnaj Liujcwngz、gyaez Liujcwngz!